

船山遺書

第三函
函六册

禮記章句卷五

衡陽王夫之譔

王制

盧氏植曰漢孝文皇帝令博士諸生作此王制之書今按篇內獄成告於正正者漢官也又云今以周尺六尺四寸爲步今者漢制也則盧氏之言信矣當漢之初秦禁初弛六籍未出尙書周禮孟子之書學者或僅有聞者而不能盡舉其全文帝閱古王者經世之典湮沒無攷故令博士諸生以所憶習輯而成篇其於虞夏商周宰制天下之大法亦略具矣其間參差不齊異同互出蓋不純乎一代之制又不專乎一家之言則時有出入亦其所不免也自今觀之有若駁而未純而當文獻不足之時節取以記四代之良法傳先聖之精意功亦偉焉至其孰爲周制孰爲夏殷之禮固有難於縷析者讀者達其意而闕之不亦可乎程子曰其事固有不可一一追復蓋至論也凡三十五章

王者之制爵祿

王者通三王而言制裁定而立爲式也祿之爲言錄也錄其功而賦之田與粟也酒器容一升曰爵先王祀於大廟因行酬爵而授之命故謂之爵先言祿後言爵者在其位則食其祿年必五十而後賜爵也

公侯伯子男凡五等諸侯之上大夫卿下大夫上士中士下士凡五等

此言王者之制爵也先言爵而後言祿此以祿視爵者言之也諸侯之上大夫卽卿也無中大夫者諸侯之上大夫視天子之中大夫也不言天子之卿大夫士者於後見之

天子之田方千里公侯田方百里伯七十里子男五十里不能五十里者不合於天子附於諸侯曰附庸

此下四節皆言王者之制祿也田兼公田私田而言公田上所入私田以養公田故皆繫之君之祿田焉方開方也其積實之數見後章不能不足也合會也謂與朝貢之事也附於諸侯者以其貢賦裨益附近之大國而佐之受事也庸功也謂效職貢之功也

天子之三公之田視公侯天子之卿視伯天子之大夫視子男天子之元士視附庸

此言田者皆專以公田言之食其祿而不有其土也若視公侯者公侯提封萬井公田百萬畝則其祿亦百萬畝也餘放此元士上士附庸大小無恆此之田視附庸者以降殺差之其方三十里與中大夫下大夫中士下士祿必有差而此不言者略文此節言天子卿大夫士之祿制而制爵之等亦見矣

制農田百畝百畝之分上農夫食九人其次食八人其次食七人其次食六人下農夫食五人庶人在官者其祿以是爲差也

分扶運反食祥
吏反差又宜反

制謂授田之制農田一夫之田百畝除一易再易而計其歲所實入也分所收粟之等也一人之食以中歲爲率月食三鬴歲三十六鬴六斗四升凡二百三十斗四升古之量器所容者約大約抵今官斛八十斗有奇食九人者三百二十四鬴餘放此算之庶人在官者府史胥徒工賈奄奚之屬其著有尊卑局有閒冗因以制其差也凡此皆公田所入公家斂之以歲月頒之而不分以

田也

諸侯之下士視上農夫祿足以代其耕也中士倍下士上士倍中士下大夫倍上士卿四大夫祿君十卿祿次國之卿三大夫祿君十卿祿小國之卿倍大夫祿君十卿祿

諸侯之下士亦受祿而不分田故孟子曰惟士無田謂下士也此惟諸侯之下士則然若天子之下士其祿厚皆有祿田矣其諸侯之庶人在官者則同於天子其中士以上則分田以爲祿倍下士授公田二百畝爲養公田者十六家也餘放此卿卽上大夫四大夫者四下大夫也大夫以下祿不以國小而減者所入少不可再減也

右第一章

次國之上卿位當大國之中中當其下下當其上大夫小國之上卿位當大國之

下卿中當其上大夫下當其下大夫

當丁
淚反

此承上章制爵而言諸侯之卿大夫衣服喪祭之制及見於天子使於鄰國而

待之之禮當猶如也言其序立之處勞燕賜贈之節相如也前章言諸侯之上大夫卿者謂諸侯之卿卽上大夫又言下大夫者言諸侯之大夫皆下大夫自受命於王而言也此章復於卿分上下之等而大夫又有上下之異就其國之分職而言也凡此類皆雜引成文不相爲通讀者不必泥也

其中有中士下士者數各居其上之三分

有謂備介數也數禮數上上士三分三分之一也謂相去二等惟上士爲受命則待之有恆禮中士下士不命或使備末介則各減於其上士之數凡三分而得一也中士下士均爲不命之微者雖制祿分職有中下之異而待之同惟上士爲殊耳

右第二章

凡四海之內九州州方千里

中國三面接海而云四海者據居延爲西海斥大之辭也九州揚荊豫青兗雍幽冀并也八州以爲侯國王畿當其一方者以方田之實言之四方各千里爲

方百里者百爲方一里者百萬也每一州不必皆齊截如數但得提封百萬井
卽名爲方千里矣

州建百里之國三十七十里之國六十五十里之國百有二十凡二百一十國名
山大澤不以封其餘以爲附庸閒田八州州二百一十國

有于救反開戶
艱反下並同

此言畿外八州侯封之制也百里之國提封萬井三十國去田三十萬井七十
里之國提封四千九百井六十國去田二十九萬四千井五十里之國提封二
千五百井百二十國去田三十萬井合計二百一十國去田八十九萬四千井
餘一十萬六千井所謂其餘也名山大澤不入田數下與民共之上以時入其
財用於天子之玉府閒田空閒之以待慶賜也州二百一十國八州合得千六

百八十國

天子之縣內方百里之國九七十里之國二十有一五十里之國六十有三凡九
十三國名山大澤不以盼其餘以祿士以爲閒田

盼布
還反

方百里之國三公視侯者也七十里卿視伯者也五十里大夫視子男者也方

百里之國九去田九萬井方七十里之國二十一去田一十萬二千九百井五十里之國六十三去田十五萬七千五百井共去田三十五萬四百井餘田六十四萬九千六百井下云天子三公九卿二十七大夫而此公之國九卿之國二十一大夫之國六十三者皆爲有致仕者及其子之世祿也以此推世祿之法漸卽於減不然則又不但於此而已變封言盼者內諸侯食侯國之祿而不嗣其社稷也祿士之法視附庸自五十里以下多少不等大約八十一而三倍之恆有二百四十三士之祿田也閒田所以待王子弟之封者縣內提封百萬井去其中之百里萬井以共官餘九十九萬井皆盼祿之地恆畱有餘以節宣之又其餘則所謂以爲御者是已

凡九州千七百七十三國天子之元士諸侯之附庸不與

興羊
御反

千七百七十三國據周初千八百國而言之然則所謂千八百國者封域大小固難畫一記者據擬爲一定之制恐當時固不能然朱子所謂建國必因山川形勢無截然可方之理是已

天子百里之內以共官千里之內以爲御

共九谷反

官諸侯百官之儲待文書御天子冠昏喪祭燕好服食之屬也百里之內不以盼租稅所入以待諸侯治官府千里之內內諸侯之職貢及閒田之入以供宗廟及上所用也

右第三章 此章承上制祿而言王者分土建國之制

千里之外設方伯五國以爲屬屬有長十國以爲連連有帥三十國以爲卒卒有正二百一十國以爲州州有伯八州八伯五十六正百六十八帥三百三十六長八伯各以其屬屬於天子之老二人分天下以爲左右曰二伯

長丁丈反
州所勉反

方伯卽八伯也東西南北四隅各以方立州故曰方伯卒猶卒伍之卒謂相聚而爲伍也各以其屬者率其卒連屬之侯邦也老上公分天下爲左右據周公召公分陝而言其後沿革不定記者亦大略言之爾

千里之內曰甸千里之外曰采曰流

甸者畿內地爲王出田稅供車乘者也采三千里之內諸侯之國采事也謂服

王事也流在采外四裔之地流蔡之域也此與尙書及周禮職方事不合記者傳聞之異約略記之爾

右第四章 此章推廣制爵之義而記王者建伯以統諸侯之制

天子三公九卿二十七大夫八十一元士

三公太師太保太傅與王坐而論道者也九卿少師少保少傅與六官之長也元士上士方氏據周禮太宰之屬推之中士倍元士下士倍中士則中士當百六十二下士當三百二十四其說近是然自公卿以下因事立職因材命官固無執一之禮記者亦言其大略爾又按周禮司徒之屬鄉老二鄉則公一人鄉大夫每鄉卿一人是別有三公六卿然皆以致仕之公卿爲之專司德教不與政事不在此建官之數也

大國三卿皆命於天子下大夫五人上士二十七人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人

三鄉者兼六官之職命於天子者三命賜位位必制於天子也命於其君者再命一命未得賜位諸侯自授之以職而賜之以服不言中士下士者中下士不命不得爲爵也

天子使其大夫爲三監監於方伯之國國三人

監上格暫反
下古銜反

監督察之也其制若今撫按官巡察司道去留更代不恆任也監於方伯之國者居方伯國中督察一州諸侯國三人方伯國八凡二十四人也上言天子之大夫二十七人此爲監者已二十四人前後不合凡此類皆雜而不純者也

右第五章 此章承制爵而備記王國及侯邦班爵之制

天子之縣內諸侯祿也外諸侯嗣也

祿者生則食其地而不就其邑以建國君民沒則祿其子以元士之祿也嗣繼世也內諸侯選賢與能以共天職外諸侯則以先世之元德顯功及王之懿親推尊親之義世君其國以定民志所謂仁義竝行而不悖也

右第六章 此章承制祿而言內外建侯之異

制三公一命卷若有加則賜也不過九命

卷與衰同
古本反

一命謂加一命也三公八命加一命則九命而服衰矣衰之服九章冕十有二旒與天子之上服同所不及天子者無大裘冕而已若有加則賜者卽指上而言其非常也命極於九三公與王者之後皆止於此

次國之君不過七命小國之君不過五命大國之卿不過三命下卿再命小國之卿與下大夫一命

次國侯伯小國子男大國謂公國也不言次國之卿者略又次國之卿再命視大國之下卿也下大夫對卿而言卿卽上大夫也凡命之多寡宮室衣服車器禮儀各如其數言不過者命皆以次而受雖爲諸侯終喪入見以士服見不畢命之待其歲時來朝功德可錄而後加之命要其終竟不踰九七五之數也蓋有公而不九命侯伯而不七命子男而不五命卿而不三命者矣所爲馭爵以勸天下之賢也再命不言不過命之爲卿則已再命也

右第七章程 此章承制爵而言授命之制上七章皆記王者班爵授祿之制蓋

宰制天下之大端而下章以下記選賢能馭刑賞行典禮之制皆本此以緣飾之三代之大法所異於後世者莫如封建封建既定而文質經緯壹皆與之相準而立故記者首述之於篇端而餘皆次焉則古今之同異可攷而得失之原可悉推矣

凡官民材必先論之論辨然後使之任事然後爵之位定然後祿之

官制其祿爵也民人也論者攷其德行道藝也詳見第二十三章辨分別其賢否也使者授之官職任事謂克任其事位卽爵也祿因爵制故位定然後祿

爵人於朝與士共之刑人於市與衆棄之

朝直
遙反

士謂在廷之士市者衆人所聚也善者君子所同好惡者小人所同惡必於其所聚示無私也

是故公家不畜刑人大夫弗養士遇之塗弗與言也屏之四方惟其所之不及以

政示弗故生也

畜敎六反屏必
鄂反政諸盈反

畜者畜爲臣僕養者養爲廝役政與征同授之役也弗故猶言無故人之生也

必有效於君長而受征役以盡分義今既不數之於凡民之列則雖生而亦無謂矣此承上文刑人於市而言既與衆共棄則一棄而不復收蓋刑人雖不必致之死而實不比數之生人之列是以王者必公慎行法而不敢以私斷也舊說此爲夏殷之制周則有門關內囿積之守未知是否然引而進之則有宦寺竊逆之禍推而遠之不問其所之則又有累於好生之仁而羣亡賴之無歸抑將聚匿山谷以爲寇竊兩者之患正相爲均此肉刑之弊聖人固有待於後王之改革漢文帝除肉刑而易之以笞杖躡矣或欲復之不亦愚乎

右第八章 此章承上制祿爵而言王者所以善其刑賞之用惟公與慎而已矣上七章之制體也此章所言用也體立而後用行亦惟用之行而體非虛立也自第九章以下備記王者馭諸侯齊萬民之大用皆封建之所以可行而久安長治之本也

諸侯之於天子也比年一小聘三年一大聘五年一朝

比必二反
朝直遙反

比年每年也小聘使大夫大聘使卿其貢享之重輕與十者勞賜之禮亦差焉

朝述職也

天子五年一巡守

舒文反下同

巡周行省視也守者諸侯之所守

歲二月東巡守至於岱宗柴而望祀山川觀諸侯問百年者就見之命大師陳詩以觀民風命市納賈以觀民之所好惡志淫好辟命典禮攷時月定日同律禮樂

制度衣服正之

大他蓋反賈居牙反好呼報反惡烏路反辟匹亦反

歲當巡守之歲也二月夏正建卯之月岱宗泰山在今山東泰安府謂之宗者五嶽之長也柴燔柴祭天以告至望祀山川者望其方之名山大川遙祭之也觀見也諸侯其方之諸侯百年百歲者就見就其居而見之也陳采而觀之也市司市納賈以物價之貴賤告也民所好者則貴所惡者則賤質樸則費用物邪侈則貴靡物故於賈而知民之好惡也詩言志賈從好志淫好辟於詩與賈見之王者省知當有以易之也典禮諸侯之宗伯時者十二中之序月者朔望之準攷時之中月之朔日可得而定矣同陰律陽律制者宮室車器華樸之

式度其大小長短高卑之則也衣服上下吉凶之別正者革十者之差忒而一如先王之法也此一節記巡守而修典禮飭政教之事

山川神祇有不舉者爲不敬不敬者君削以地宗廟有不順者爲不孝不孝者君絀以爵變禮易樂者爲不從不從者君流革制度衣服者爲畔畔者君討有功德於民者加地進律

神天神祇地祇諸侯所祀之天神則風雨寒暑星辰之屬也不舉廢其祀也不能敬神則不能君國故削不順謂不能孝順以修祀事本德旣虧故絀爵變易服樂自賢智以干王度故廢其君而流之改革制度衣服則是僭行王事以疑民畔天子故罪尤重而討戮之功謂爲民捍災德施仁惠也律法也謂命數車禮儀章之差等也此一節記巡守而飭刑賞正諸侯之事

五月南巡守至於南嶽如東巡守之禮八月西巡守至於西嶽如南巡守之禮十一月北巡守至於北嶽如西巡守之禮歸假於祖禰用特

假古
伯反

五月八月十有一月皆以夏正言南嶽衡山在今湖廣衡山縣西嶽華山在今

陝西華州或曰周以鞏昌之吳嶽爲西嶽未知是否北嶽恆山在北直隸曲陽縣如其禮者自柴望至賞罰諸侯事皆同也祖太祖以及羣廟假告至也特特牛不具羊豕者非正祭也每廟一牛七廟凡七牛矣

右第九章 此章記述職巡守之制大率以尙書爲本而與周禮不同然一歲四巡三時而徧天下古者吉行五十里乃四嶽相去或三千里而遙行程不給況可得而行典禮修政教乎凡此類通其義不必泥其文可也

天子將出類乎上帝宜乎社造乎禰諸侯將出宜乎社造乎禰

將出者有吉行之事也類宜造皆祭名類者以事類告也宜者奠安之之意造行也謂告行也諸侯不得祭上帝社卽地祀也出必祭告於所尊親者示不敢專且或踰時乃返祭爲之廢必先告以避不祀之愆

天子無事與諸侯相見曰朝攷禮正刑一德以尊於天子

朝直遙反

無事者非述職之常期相見者來朝而天子見之也一齊也德教也尊道也禮刑德教雖有常典而或時需變通諸侯不敢自擅損益則朝焉而請正於天子